

法苑珠林

法苑珠林卷第八十八

唐上都西明寺沙門釋道世玄暉撰

罪福篇第八十

述意部

夫善惡相翻明暗相反罪福冥對皎若目前所以惡
名俯墜善謂清昇福是富饒禍爲摧折故知罪惡之
法不可弗除福善之功無宜不造聖教明白昇沉可
觀也

業行部

述此行名聖說不定所謂罪行諸經或說名黑黑業

及不善業凡夫福行諸經或說名白白業及以善業名雖種種行體無殊行體云何如智度論說殺害等是不善業布施等是善業此則是說罪福二行言殺等者等取十惡齊名罪行言施等者等取事中戒定等業同是世善俱名福行此世善中八禪定者望欲界亂善名不動行若望出世理觀智慧此緣事住則名福行如說六度前五度中所有禪定通亦名福但諸罪福人行不同或專修福或唯造罪或復有人罪福俱行專修福者所謂淨心爲益他人行施戒等唯造罪者謂無慈潤動身口意皆爲損他罪福俱者謂

修福時內心不淨或兼損物此則是其欲界雜業非
純淨故亦名不淨若論罪行麤顯可知若論雜業與
淨福行有同有異稍隱難知謂諸修福據其外相事
中信樂所作皆同若據內心爲自爲他所求各別精
麤不等以諸修福外同內異故有純雜二業不同若
能調心慈悲愍物隨所施爲皆成大善若不守念視
相修福內麤外細唯成雜業稱彼愚情雖謂過世理
實違道亦非淨福以修福時不觀生空我倒常行徧
通三性所有作業與倒相應是假取性是故違道以
不定心多求世報又多求名故非淨福以此純雜世

俗多迷今略偏論令人識行先論雜業後明淨福但諸雜業自有麤細麤者爲惡兼損他人細者自爲唯求世報先論麤雜若就施論或有非法取財施者如盜他物以用布施此感來報還常衰耗施已生悔得果亦然故優婆塞經云若人施已生於悔心若劫他財持以布施是人未來雖得財物常耗不集或有爲施兼損他者謂若施時不正念善或生瞋恚或起高慢當墮惡道雖得福報畜中別受不感人天故分別業報經偈云

修行大布施

急性多瞋怒

不依正憶念

後作大龍身 能修大布施 高心陵懷人

由斯業行生 大力金翅鳥

若爲修福求世報者如捨財時自求來報或恐身財
無常故捨或爲名聞專求自益此非慈悲爲濟貧苦
猶如市易非純淨業是以經中名不淨施如百論說
爲報施者是名不淨施如市易故報有二種現報者
名稱敬愛等後報者後世富貴等名不淨施譬賈客
遠到何方雖持雜物多所饒益然非憐愍衆生以自
求利故是業不淨布施求報亦復如是以此證知無
實慈愍自求名稱或爲來報縱雖廣施皆非淨業業

非淨故得報不精故分別業報經偈云

若爲生天施 或復求名聞 酬恩及望報

恐怖故行施 獲果不清淨 所受多麤澀

施行旣爾戒等諸善不淨同此故百論云不淨持戒者自求樂報若持戒求天上與天女娛樂若人中富貴受五欲樂爲姪欲故如覆相者內欲他色外詐親善是名不淨此外細心不淨持戒如阿難語難陀說偈云

如羝羊相觸 將前而更却 汝爲欲持戒
其事亦如是

開心專爲益他得福則多又於施境有貧有病或有
知法而乏所須若施令彼得益長善所施有宜獲福
則多故賢愚經云佛讚五施得福無量所謂施遠來
者遠去者病瘦者於饑餓時施於飲食施知法人如
是五施現世獲福此施有宜現獲多福不同求名施
非要處雖多割捨不得淨報又隨喜他施者若望諸
極麤造不善者是其細罪亦得名善若望離欲及專
爲他此之雜業則是其罪故智度論云麤人有麤罪
細人有細罪故此雜業罪福俱行望心非純是不淨
業上來明其罪福俱行是其欲界不淨雜業竟若論

淨業翻前可知故百論云淨施者若人愛敬利益得福亦多故因果經偈云

若有貧窮人 無財可布施 見他修施時
而生隨喜心 隨喜之福報 與施等無異
又丈夫論偈云

悲心施一人 功德大如地 爲已施一切
得報如芥子 救一厄難人 勝餘一切施
衆星雖有光 不如一月明

若諸凡夫造其罪福不解因果善惡無性是爲迷事
取性常繫三有故智度論云譬如蠅無處不著唯不

著火燄衆生愛著亦復如是善不善法中皆著乃至
非想亦著唯不著般若波羅蜜性空大火以此證知
無善惡性常輪五道卽當無佛性衆生也此略明凡
夫罪福二行迷事取性所依經論竟

罪行部

迷曰此明聖者就後福行說有罪行者但此罪行妄
見境染執定我人取著違順便令自他皆成惡業是
以經偈云貪欲不生滅不能令心惱若人有我心及
有得見者是人爲貪欲將入於地獄是故心外雖無
別境稱彼迷情強見起染如夢見境起諸貪瞋稱彼

夢者謂實不虛理實無境唯情妄見故智度論說如夢中無善事而善無瞋事而瞋無怖事而怖三界衆生亦復如是無明眠故不應瞋而瞋等故知心外雖無別境稱彼迷情妄見起染心外雖無地獄等相惡業成時妄見受苦如正法念經云閻魔羅人非是衆生罪人見之謂是衆生手中執持燄然鐵鉗彼地獄人惡業既盡命終之後不復見於閻羅獄卒何以故以彼非是衆生數故如油炷盡則無有燈業盡亦爾不復見於閻羅獄卒如閻浮提日光既現則無暗冥惡業盡時閻羅獄卒亦復如是惡眼惡口如衆生相

可畏之色皆悉磨滅如破畫壁畫亦隨滅惡業畫壁亦復如是不復見於閻羅獄卒可畏之色以此文證衆生惡業應受苦者自然無中妄見地獄問曰見地獄者所見獄卒及虎狼等可使妄見彼地獄處閻羅在中判諸罪人則有此境云何言無答曰彼見獄主亦是妄見直是罪人惡業熏心令心變異無中妄見實無地獄閻羅在中故唯識論云如地獄中無地獄主而地獄衆生依自然業見地獄主與種種苦而起心見此是地獄處此是夜時此是晝時我以惡業故見狗見鳥或見山壓以此文證善惡熏心令心異見

實無地獄是故心外雖無地獄惡業成時強自妄見
問曰此苦業報既非善事寧不直爾說善令習何須
稱情說苦業耶答曰善惡因果法須相對若不說其
貪等是過何由得顯施等是善若不宣說三塗是苦
無由得顯人天等樂是故須說凡夫罪行令人識知
厭離歸善若鈍根者聞此苦業生厭離時卽求世樂
因此轉心修諸福業若利根者聞此苦業生厭離時
卽求解脫因此轉心能修道觀便於惑中得起出因
故經說言一切煩惱皆是佛種故知苦業厭離之本
起善之緣是故須說若不說此惡業罪行衆生不識

常行不斷雖稱情見說諸過惡然實心外無別業苦
唯識無境心體恒淨故經說言雖說貪欲之過而不
見法有可貪者雖說瞋恚之過而不見法有可瞋者
雖說愚癡之過而知諸法不癡無礙雖示衆生墮三
惡道怖畏之苦而不得地獄餓鬼畜生之相以此文
證知罪行因果唯心無外凡愚不解稱情方便須說
業苦向來兩門就其實教說罪體真無別可破以愚
未解須定說罪此是別明愚人迷真妄解故須定說
罪行意也

福行部

述曰此明福行者對前罪行說此福行先明凡夫修欲界善者但使亂心修諸事福定生下界名欲界業五道之中皆悉得起先就地獄述者依毗曇說地獄之人亦有三善業卽是意地三善根此唯成就非是現行以是難處多不聞法思量趣道故無現行若論生得善根地獄亦有如仙譽國王殺五百婆羅門生地獄中發生信心生甘露國故知現行若依成論亦說地獄有善現行雖無力勵方便起善修獲聖道然有生得善根起善謂諸衆生無始以來曾修世間信進念等未起邪見謗無因果此善不滅生便得之名

爲生得善依此善根得起善心若有宿業感緣强者
大聖現化令苦止息爲說道法得修方便第二畜生
龍等亦有修善如涅槃經佛說義時無量鳥獸發菩
提心生於天上若依毗曇鬼畜十善非律儀攝以其
身口七善律儀普於一切衆生處起以鬼神不能受
故故薩婆多論畜生以癡鈍故不發律儀若依成論
鬼神畜等亦有得戒若就人中北單越人唯成意地
三善業道而不現行不斷善故至劫盡時人皆修禪
彼獨不能離欲非分自餘三方皆有十善有不具者
若就欲界六天以論卽無出家別解脫戒但有十善

及在家戒故成論云如天帝釋多受八戒龍等亦受
不局在人若論色界諸天以論依毗曇生上失下上
界不起下界善業以其界地因果斷故身生上界下
地法斷此據有漏在下成上生上失下便不修起若
依成論上得成下亦得寄起下界善業如諸梵天見
佛禮拜發言讚歎卽是散善此是寄起欲界善業若
依毗曇毗婆沙論等梵天禮讚非欲界善是其初禪
威儀心起據此所依無記非善據外身口是上色業
此明欲界亂善福業依身起處竟第二明色界四禪
定業依身起處若鬼畜中值聖強緣能悟道者亦得